



# Вуды нёхи сопаслаты пора елды манал

**Округев хуват вуды нёхи сопаслаты пора елды манал. Ъорвош районан МСП «Мужевское» хонна хорсащал. Там тадан арпелак, лув ёра вуды тайты хоятат нёхи малат.**

Товийн Ъорвош районан ветсот вуды маты ураңан договор нэпек дэсятман ус. Совхоз вулэт тампуш хорты ант питдайт, шавидайт. Кат тал сыс тащел 5340 вуды элты 7500 унты энмалты вутсилэл. Си ураңан хор вулэт мосмитлат. Номас версат «Байдарацкой» совхозан нялъяң хор лутты. Щит шеңк ям.

Вуды хорты порайл Мужийн ван хатлап тыдась хольмаңмет хатл унты манал. Ияха луңатман нялъяң педа нийл тонна нёхи дэсятты вутсилат. «Горковской» совхоз хасям тал унты па нялъяң педа хулам тонна нёхи дэсята. Ин хорсащты тахайн яртыяң хоят рупитал. Ъув кутэлан кат вуды леккар.

Там мосванан Ъорвош район администрация вуды нёхи понты вакуумной упаковщик лутас. Симась хошапан нёхи хувшак па ямашак шавашал.

«Тампуш Мужевской сельхозпредприятие элты мет олңа кимет бригада вуды хорты тахая нийлъяңкем вуды воштас. Си тащан бригадира Евгений Анатольевич Талигин рупитал. Хасям лапатан кат хатл сыс вудыдал хорсалдал.

Там лапат етшаты унты олаңмет бригадин кусяя улты ху Виталий Николаевич Озелов ёхатал. Ин лув вудыдал коралы воштасдал. Сита пирыдат, муй войдал хорты, хойтыдал хайты. Ъув тащел мет хуван ул, Варчато дор Танья ёхан педа. Катсот вуды нёхия маты вутсилат.

Округ па Ъорвош район постама хатла, округ куся тащан яңхты хоттэлата мойлапсайт дэсята. Ъув кутэлан Виталий Николаевич Озелов ус, «Буран» донщхопан мойдаса. Яма рупитмал ураңан.

Мет юхат, Вячеслав Антонович Лонгоров нядмет тащ элты вудыдал вошталды. Ъув катсот педа ветъяң вуды маты дэсята. Хусмет хатл юпийн ёхатлат.

Питдор элты Виктор Александрович Сязи ёхтыдыйс. Пенсияйн ул. Си елпийн Питдор тащатан вуды леккара рупитас. Ъув ясңал элты, куртэл пуңалан кат тащан улты вулэт хорсайт. Сита холна Мохсар ёх йи тащ хасяс. Вудыдал холна воштадал.

Мужевской совхозан дэсятты нёхи мет олңа ашкудаята, леккар хотата па ай няв-



Хор: адммуji.уанао.ру

**Виталий  
Николаевич  
Озелов округ  
кусяйн  
«Буран»  
донщхопан  
мойлаптаса.**



Хор: Альбина Тырлина

рэмат яңхты тахаята тудайт. Хасям отдал куртаң хоятата тыныдайт», – Ъорвош район шоши мир ёх па сельской хозяйство верат туты волаң специалист Иван Эдуардович Сандрин ясаң верас.

Альбина Тырлина  
ханшам потар





## «Мастер фольклорного жанра» пирыса

Округ сэмна питам волаң емаң хатл кеша холам мастер фольклорного жанра пирыса. Ши пилтащиты хар 2016-мет тал эвалт ол. Лув Овс мув шоши мир нэхэт цират-пицат савиман па алңиц туты ораңна лэщатса. Нох питты нэхэт пирыты ораңна экспертной совет актыдыса, щита народной творчества, наука, цират-пицат, шоши мир СМИ па па кощайт лоңман осат.



Ор яхат кутна «Мастер фольклорного жанра» номинация Нонна Салиндер Антипаютинской мув эвалт сытас, ар нявремаң ның, лапат няврем энмалтад. Нонна Владимировна лув хансты ардал арийл.

Ёрн ях кутна Нелля Бадида Толька похал Красноселькупской район эвалт. Нелля Николаевна – ёрн ясаңл сэңк ямас хасладды. Лув хансты потарлад «Северный Край» газетайн луңатта рахлат.

Хантэт кутна па тампус «Мастер фольклорного жанра» номинация Галина Граблевская Натаң вас эвалт сытас. Галина Михайловна Мужийн сэмна питас, 15 молтас тал Ямал мув кас верты хататна ропытас. Итта лув «Тови най» хантэт культура клуб коща ныңи ропытал па «Мелне» декоративно-прикладной творчества верты хатна пилтащил. «Культура народов Ямала» культурно-образовательной проект онтасна Натаң нявремат ораңна муң мувув пушци урокат тул, щита лув Овс мув нэхэт цират-пицат, фольклор па велпаслаты верат пуляң лавадтад.

Вера Лонгортова  
хансам потар

## Волаң нётопса верал

Пулцават вошн «Мувхор» садикан Маргарита Петровна Батютенко (Возелова) воспитателя ул, ай эвиет па похат пидан рупитал. Рупитты тахаелан «Тундровичок» нэмпи пормас шавиты хот пуншас. Сита уйтантопсайт верлат, емаң хатлат постылат, мойң хоятат пидан уйтантылат.

Хасям лапатан пормас шавиты хотан «Овас мувие» нэхат пидан мастер-класс лэщатас. Еңта пасан суран потар тувман, СВО хося улты хоятата пормасат понты хирьет ёнтсат па мойлапса дарась акатсат. Кашң ёхтыдыйм нэ молты мосты пормас ёх хоятлува лэщатас. Ёнтам хирьета мосты пормасат понтсат.

Маргарита Петровна СВО хося улты хоятата олаң хатл элты нётты питас. Сит элты лув ястас: «Ма рутлам кутан ляль манти харан ар хоят ул. Олаң хатлат элты вошеван верты нётопса тахаята мохты пидтасьсам. Тохи яңхты хоятат пидан паркан элты посат, сэвам вайт сэвты питсуб. Садикан чебурашка ар ёнттот ёнтсуб, китсуб. Муй иса верлудв. «Доброварежка»

акцияйн охаң сертификат шитсам, охлад СВО хося китсалдам. Муй арат холап сэвсуб, балаклава ёнтсуб. Ма атэл йи холап лэщатсам. Кашң порайн пормасат китлудв. Хун кум тайдам, иса нётдам. Там уйтантопсайн си тахайн улты хоятлува ханты нэхлудв пидан мосты пормасаң дарась акатсуб. Ялап тал емаң хатл елпийн ляль харан улты ёхлудв мойлапсайлудв шитлат.

Ходна ястаты утсидам, ма Пулцават вошн торах муш леккар хотан улты шоши мир ёх няврэмата нётдам. Лувилада шеңк ар ант мосал. Сэвам вайт, ай кащат, эвета па похата ернасат акатты рахал. Хой муйн нётты верытал, няврэмдын элты хасям ям думатты сохат, пормасат туты рахал. Ялап тал емаң хатл ванамад. Си няврэмат па мойлапсайт давадлат. Кашң хоятэв лувилада нётты верытал».

Ма Маргарита Петровна мойлапса ясаңан ястаты утсидэм. Тумтака ула, наң верты



Маргарита Петровна Батютенко  
(Возелова)

верэн елды кеншака ат манал. Хун симась хоятат уллат, хой нётапсайл сам элты манал, си хоят нёмолты паптап ант тайл, верты верал туп ой па амат тул.

Альбина Тырлина ханшам потар



## Леккар аршак питал

Хашам ятан Ямал мува аршак леккар ёхатты питас. Ванты там муван, па мув суңат пидан артадаман, щеп ох тарамты аратан мада, улты хот ищи саралада.

«Земский доктор» па «Земский фельдшер» программат

онтсан 2020-мет тал вуш элты округева 141 леккар ёхтас. Ши тумпийн шеңк яма рупитал «Врачи, нужные Ямалу», там программа щирани йи миллион солдува мада.

Леккар хотата мосты пормасат икулдтан лутыдыдайт, 2021-мет

тал вуш элты 1188 рупатая мосты пормас па 40 автомобиль.

Леккарат па няврэмат пидан рупитты хоятат северной нётопса рупитты питцаты олаң хатл элты ёша вулат.

Аллина Тоярова ханшам потар



# «Сам лэрдам. Струны моей души» луңтап этас

Хащам лапатан, ван хатлап тыдащ ихоцъянмет хатадан, Пулцават вошан арадал мир Национальной библиотекайн акташийс. Щита ванта, Валентина Петровна Лонгортова «Сам лэрдам. Струны моей души» ханшам луңтап мира эталтаса.

Там ошаң-щащан ханты нэиём ма хольмаң педа вет талкем уйтлэм. Леонтий Антонович Тарагупта пидан рупитыдысман. Радио хуват потар тутдысман. Щи порайн Валентина Петровна ищи потрат ханшидыйс. Лув куш ай потар ки ханшал, щита, матты ки, талаң мир наң елпенан этал.

Каматса ясаң лув ястас там луңтапал элты: «Сэмъийнқ суран, антома ювам хоятлам потартыйм щират, удам-ходам щират нэпека постаслам. Щалта па ма, потар шуплам ханшсалдам. Ясаңдам лэщатсалдам. Муй ястадам? Хой нэпекем луңатты ки лаңхал – луңталн. Хой кашл антом ки – па щит, нын веран».

Хоты сахат па хун там щащан ёхатса, лув ищи ястас: «Катра порайн хоятат иса атаң-хатл арыдысат. Муң щи арат онтасан ил во-ямтысаюв, нох килдыдысув. Аңкем манэма па яйема иса арыдыйс. Кашц отэв ишкан-щап тайс. Мет олаңан манэм



Хор: Аллина Тоярова



арылды. Ванты, ма айшак. Ма шеңк амтыдысам: муй хорпи ёшиидам, курыидам. Муй хорпи хорамаң вайн па сахан ма шушидылам. Щи

хорпи ма хорасаң эвие... Яйема арымал порайн, мохты нёсарщисам. Юхат хащ яха питыдысман, хой ар ямшак.

Аңкем муңев ёнтопсаята хушидысды. Сумат похал дойл па ястал: «Хоты наң, эвие, нумаслан, лув кутлалан пиднэңат?» Ма ястадам: «Антом, лув опет-апщет». Яйм па ястал: «Антом, лув духас нэңат. Саран нэңат хорпет». Аңкем онтасан ма араң-монщаң вер елды тулэм. Ин ма щи веран ханшлам. Щи порайн шеңк умщаң па ойң хатлат ма улапсаеман усат. Папуш няврэмат ураңан па луңтап

Валентина Петровна Лонгортова

этал. Хота ханшсам, хоты сахат катра порайн няврэмат тащ хотан энмалдысат, ёнтыдысат».

Тамащ хоятат онтасан муң ханты мир ясцев ант ушал. Няврэмат лаңхаман ялпа этты луңтапат луңатты питлат. Валентина Петровна, ойңа-пищаңа, йисаңа-нуптаңа! Ищиты елды муңев амат тува, ялап потрат, арат, монщат ханша, нэпеката ат йилат.

Аллина Тоярова  
ханшам потар

## ОБЪЯВЛЕНИЕ

**ДЕНЬГИ БОЛЬШЕ  
НЕ ТВОЯ ПРОБЛЕМА**

**5 300 000**  
РУБЛЕЙ В ГОД

**2 600 000**  
РУБЛЕЙ ЕДИНОВРЕМЕННО

**ПРИ ЗАКЛЮЧЕНИИ  
КОНТРАКТА  
НА ЯМАЛЕ**



Там QR-код хуват лоңаты па вантаты, муйсыр нётопсайт СВО хоща улты мохета мадайт. Щи тумпийн нэңдала, няврэмдала, аңкидала па ащилала ищи нётопса вуты рахал.

**Айкед соращак  
мощатты ураңан**





# Овкурт ашкуда ярсот тада йис

Тампуш Лорвош районан Овкурт вошан ун емаң хатл постаса, ашкудаел ярсот тада йис. Ямал муван ши уталтыты хот мет катра ашкудайт кута луңтасал. Округев тыйм тал эдты туп вет тал хашаман омасса. Хув нуптал манам сус, арпуш ялап хотан опсыдыса, уталтыты хоятал арамас.

## Каш хар дарпитысат

Там емаң хатлэда Щаня ёх шеңк яма лэщатысат. Ашкудаел хорапсэл, камн сыр вантоп-сайт лэщатсат, ун каш хар дарпитыса, ашкудаел ярсот тада ювам хатл постасат. Ши хатл мойң ёх кутан ашкудайн ар тал уталтыйм хоятат, администрация куцайт, едпи щита уталтыйм мохет усат. Овкурт утхот куца Михаил Васильевич Лонгоров, ашкуда директор Анна Степановна Важенина, вошаң хоятат емаң хатл кеша мойлапса яснат ястасат.

Хатл олаң шупан антет па ащет няврэмдал уталтыты верат педа вантты верытсат, открытой урока́та яңхсат, арталасэл, хоты лув шуцийла́д яма уталтылат.

Хорамаңа луматдыйм, каркам па апраң эвет па похат туса



Хор: spmuj.ru

арэмасат, якапсат, ашкудаел эдты умах яснат ястасат. Хув па вещьката ашкудайн рупи-там хоятат ишакты нэпекатан юкантсайт, мойлапсаятан, хо-шам ясаңан ястасайт. Потар-там, арийм, якам мохет педа вантман, сам амтас, хоты лув ашкудаел умахдылэл, сама ва-нан тайлэл.

## Ашкуда олаң талдал

Овкурт вош 1895-мет талн тыйс. Олаң ашкуда щита 1935-мет талан щёхар тылащан пуншса. Ши уталтыты хот наңк юхат эдты верса. Ши по-

райн вош дыпийн щит мет ун хот. Щита кат уталтыты класс ус, хухатдыты па ёнтты ун хув коридор, леккар рупитты таха па няд олты хотъят.

Мет олаң тал ялап ашкудая хольмаң педа хут хоят яңхас, щит шоши хантэт па саранат усат. Похат па эвет ши по-райн руц ясаң щах ант уятсат. Няврэмат акатты лаварт ус. Антидал-ащилал эвидал-похлад ашкудая маты палсат, ши по-раятан хоятат ялап щират эдты хурыман усат, шепанатан па палтаптысайт.

Ашкуда туп пуншаман, ка-матса хоят щита рупитас. Ди-

тысңан, Григорий па Гаврил (Пырысев) Пулцавта вой лек-кара уталтыты мантсаңан.

## Хоты уталтыты хот энмас па яммас

Ар тал сус ашкуда ялап хотатан опсыдыса. 1949-мет талан нийл тал уталтыты хот верса. Ши порайн 243 няврэм уталтыйс, лув эдтэл 192 интернатан ус, 13 хоя-тан уталтасайт, 6 хоятан шависайт. 1953-мет тал эдты 1962-мет тал унты Владимир Федотович Ващенко директо-ра рупитас. Ши пора эдты Щаня муван апраң па юраң спортсменат энамты питсат. Энамты ёх футболан, волейбо-лан ёнтты, дохан хухатдыты па конькийн хататдыты пит-сат, художественной гимнасти-ка, теннис, хоккей секцияйт пуншсайт. Айлат ёх муван лётотат энмалсат, Владимир Федотович биология, химия урок тус, няврэмат пидан унта походата пора хайты яңхас.

1965-мет тал эдты 1969-мет тал унты ашкуда куца́я Юрий Николаевич Афана-сьев рупитас. Лув луңтарат, потрат ханшты ху ус. Ши йисан 310 хоят уталтыйс, интернатан 210 ус. Уятты хоятат эдты арат, монщат, амаматщет акатты няврэмат хуцсайт, юннатский кружок туты питсат. Елена Ильинична Тыликова няврэмат рут мувед хуват экспедицията тутдыты питсалды. 1966-мет талан Ас нопатты тылащан олаң тепли-ца верса, камн сыр лётотат щита энмалсайт.

## Кашң хоятан ям номасан нумда

Ин там унты Щаня муван нопсаң, юраң, апраң, монщаң-араң хоятат энамлат. Няврэм уталтаты мохет – щит Овкурт ашкуда етшам хоятат, лув уталтыты маныйым юпийн, ошаң па нопсаң няврэм энмалты кеша, рут муведа ёхды ёхатсат. Ши арат тал шоши няврэмат Овкурт ашкудайн ош па номас охведамлада пайтлат.

Хув пора сус Щаня мув уталтыты хотан ар хоят уталтыйс. Кашң хоят щита хайм порайл туп ям номасан нумдалды.

Валентина Рохтымова  
ханшам потар



Хор: spmuj.ru



Хор: ovgorshool.ru



Хор: ovgorshool.ru

ректора Яков Васильевич Хо-зяинов ус. Лув шоши хоятат улапса щират-пищат уйтас, щипан уталтыты хотан ку-ца́я понтса. Няврэмат кат ху уталтасңан – Василий Леон-тьевич Хозяинов па Терентий Иванович Чупров.

Овкурт ашкудайн мет олаң уталтыты етшам хоятат: Про-копий па Гаврил Пырысевңан, Гавриил Артанзеев па Григо-рий Нахрачёв. Ашкуда юпийн Прокопий па Гавриил (Артан-зеев) Ленинград вошан утал-



# Хораман хораң вантопса Пулңаватан пуншса

Хор: Валентин Вальгамов



Хор: Владимир Енов



Ван хатлап тыдаң ихоңъяңмет хатадан Пулңават вошан Геннадий Степанович Райшев «Йис потраң мув» нәмпи вантопса пуншса. Лув И.С. Шемановской нәмпи хотан манал. Аратад мир щий курк тыдаң 22-мет хатл унты яңхты верытал.

Там едпийн лув Ёмвошн Геннадий Райшев шуңат хорат ханшты хотн хорат муй хатнэху па вой хорасат вантопса верса. Щи вантопса нэман округ куца ёхлудн лэщатса па муң округ мувлуд 95-мет тал ловата ювам емаң хатлңана постаса.

Мет олаң пуш Югра мувев хоца Ямал мув хантэт па урат

ханшам хораң муй хатнэху па вой хорасаң вантопса пуншса. Там вантопсайн щи хоятат ханшам хорат муй ёшн верам хорасат усаг, щит: Надежда Михайловна Талигина – исторической наукайт кандидат па Россия мувев Союз художников нэ, щалта Геннадий Ефремович Хартаганов шуңат – хатнэху па вой хорасат верам па Россия хон мув Союз художников ху, Игорь Лемович Худи шуңат – хатнэху па ищи вой хорасат верты па Россия мувев Союз художников ху, Леонид Алексеевич Лар – исторической наукайт кандидат па Россия хон мув Союз художников ху.

Там хораң вантопсая ёхтам

хоятат едпийн Пулңавт вошн Ямал округев мувн И.С. Шемановской нәмпи йис пормасат шавиты хот куца нэ Виктория Владимировна Самсонова онлайн щирн айкелат верас. Лув потар-тас: «Ван хатлап тыдаң 10-мет хатадн муң округ мувлуд 95-мет тада ювам хатлат постадат. Щи ураңан муң тата номас версув па «Легенды Ямала» вантопса Югра округев хоца лэщатсув. Щий муң 30-кем туса верам пормасат па хорат китсув. Дый шеңк туса муй хорасаң ханты па ур мирңан улты-холты щират элты рупатайдал лэщатсат, Югра округ хоятат ищиты дый хордал яма ат вантлат».

Ямал мув хоятат ханшам хораң вантопса куца Ёмвошн Наталья Николаевна Фёдорова – Россия мув Союз художников нэ ус. Лув потартас, хоты мет олаң пуш Ямал мув хорат ханшты ёхлуд вантопса тата лэщатсув.

Мосад ястатя, хоты там хорат верам хоятат шеңк яма па туса ханты муй ур мирңан улапса щират уятлат. Щи ураңан там шеңк умащ хораң муй пормасаң вантопса там хатлатн Ёмвошн Югра мувевн ун куца ёхат версат.

Владимир Енов ханшам потар

## Яңхты кеншак ураңан

Ас шоппи улты вошңан кутан, Пулңават па Лапатнаңк, ван хатлап тыдаң ветхоңъяңмет хатл элты «Обдорской экспресс» нәмпи хоятат тутдыты хоп эсадса.

Пулңават вош элты 07:30 щёсан манал, ёхлы – 20:15 щёсан. Лапатнаңк элты мет олаң автобус 07:00 щёсан эсадла, ёхлы – в 19:30 щёсан. Тыед-тохел кат автобус яңхты питал.

Лапатнаңкан лув Бульвар Победы элты хоятат акатад, щалта Первомайской вошхулы хуват манал железнодорожной вокзал унты. Ас шоппи мантад юпийн, аэропорт мохты «Дары Ямала» тынасты хар унты.

Тампуш щи яңхапсайн «Морошка» карта рупитты питад. Щи веран аратад тыед-тохел яңхты мир кушкепа щеп охал шаващал. Щимащ карта ант тайты хоят 100 солкува сохаптал, «Морошка» тайты от – 90 солкува.

## Овс мув улапса элты

Хашам ятан «Союзмультфильм» ай монщ-потар шупат Овс мув шимлаң мир хоятат улапса элты эсдас. Щита Умка нәмпи мойпар элты нэхты хор верман улда. Хота лув онтасадан аратад мир уйтты питад ханты, нанайцы, чукчи, эскимос, ур, охаль па эвенки мират улапса элты.

Олаң нэхты хорат рахал «Союзмультфильм» официальной страницаытан вантты ([https://t.me/soyuzmultfilm\\_official](https://t.me/soyuzmultfilm_official)). Потар манал, хоты сахат Овс мув шимлаң мир хоятат Ялап тал емаң хатл постадат, улты хотлал кашң мир хоца хоты нэмадлайт, муя па вулэт – щит лув лыдэл шавиты па нётты войт па па турамсот мосты верат щита альман улдат.

## Тал юшат пуншлайт

Там лапатан кашң курт унты тал юшат пуншты питсайт. Коротчаево – Красноселькуп 17-мет хатадн пуншса. Аксарка – Белоярск, нумасла, 25-мет хатадн пуншты. Вет тонна унты улты машинайт яңхты верытты питлат.

ЩИ веран, яңхты юшлан пайлэт ат улдат. Атом туроман хотдан элты ед ал манаты, ху-рымашак улаты.

Аллина Тоярова  
ханшам потрат



Хор: Валентин Вальгамов





# Тусдал эталтыты ураңан касты хар пуншилдыса

Кашң хоят ай пора эвалт нумасас, хота лув елды ашкуда юпийн уталтыты питал. Хой ун вошата манал, хой куртан хащал, хой ёдан аңкел-ащел вер елды тулды, хой мосаң век ант дытда елды уталтыты манты.

Ин там порана арсыр университетат, институтат, академияйт удлат. Там сыс няврэмат верытлат па хошлат мохты каматса уталтыты лотан уталтыты. Арпелак энамты няврэмат интернет хуват ищи япсыя уталтылат. Муң шоши мувеван Пулңават вошан Ямальной многопрофильной колледж ул. Щий арпелак энамты хоятат ай куртат элты ёхатлат. Рахал яртъяң па ихощъяң класс юпиян уталтыты. Тата улты таха, лэты хот тайдат. Камн специальность щира уталтылат: уталтыты нэңат, ай леккарат, кадаң (вой) леккарат, няврэм шавиты нэңат, тутаң хопан яңхты отат, худ лэщатты хоятат па арсыр отат.

Ивеван колледжан камн касты лот удлиял. Там ванан ветмет пуш тамаш нэмпи Межрегиональной чемпионат в сфере нефтегазовой индустрии, традиций и ремёсел Севера «Навыки Ямала» ус.

Пулңавта Красноярской, Оренбургской па Тюменской муват элты, Башкортостан па Ёмвош элты энамты хоятат ёхтыдысат. Шоши районлув элты ашкудаян уталтыты няврэмат па тый ёхтыдысат, па лув кутэлан ищи кассат. Наврэмат вет хатад сыс камн касты харан уйтанысат па щита эталтысат, муй лув хошлат па верты верытлат. Тамаш касты харат усат: «Ремонт и сервис нефтегазового оборудования», с исконными ремёслами и культурой коренных народов Севера: «Национальная кухня», «Оленеводство», «Управление традиционным жилищем народов Севера (чумработница)», «Национальные виды спорта», «Воспитатель интерната семейного типа», «Национальный фольклор».

Сот лапатъяң ун хоят щи касты лотан вантсат па пирысат, хой мет номпсаң, тусаң. Хой там касты хар лотан нох питас, щитат елды всероссийской конкурса папуш мандат. Шеңк ям, хун тамаш касты лот верда. Энамты няврэмат щимащ тахана ядап, мосаң па ант уйтам айкедат па верат номпса пондат. Хоят удтал ху-



Хор: Любовь Возелова

ват щи уталтыял, елды вуратал. Вещкат па номпсаң хоят ивеван па хоят элты щи молты лэрапал, инщасал. Муң энамты хоятлув улапсаел щуняң па кен ат ул.

Любовь Возелова ханшам потар



# Нампар вой па меңк ики

(Олаң шупал № 50 луңталн)

Ин Нампар войие порал пилн турсый шомая вуты хойлаңан, кал лот элты нёхлаң хул эватты сохал нох талдаңан па лувел инщаслаңан:

– Наң па муй щирн там хуват тахая питсан?

– Ма инмунты меңк икенаң нэман ты юватсайм, лулн ма тата иса ат дыйсам! – щиты нёхлаң хул эватты сохал ястас.

– Щимащ вер ки тыйс, мосаң, наң мин пилэман ищи меңк икен пилн лялястыя манлан? – Нампар вой порал пилн лувел инщаслаңан.

– Ал хун мандам, шеңк щи мандам! – мохты хул эватты сохал кашащас.

Щитэлн холыена ай хопа дэлаплат, еллы мандат па туп щиты арылат:

– Пулн кары хопиев поль-поль-поль, Ов шашна сора-сора маныдылуд!

Меңк ики пилна ляль верлуд, Ищипа, ищипа нох питлуд!

Хув муй ван кут дый мандат. Щалта посал питар йиңк элты па щи молты турсый худлат:

– Хой, хой щит манал? Ил воляты-са па манэм нох таладн, иса щи йиңкан морсайм!

Щиңанца Нампар вой, пор па хул эватты сохал посал питара мантсат, йиңк элты волтап нох талсат па инщаслат лувел:

– Наң па муй щирн йиңка питсан?

– Ма инмунты меңк икенаң ты юватсайм, – волтап ястас.

– Щимащ вер ки тыйс, мосаң, наң муң пилэван ищи меңк икен пилн лялястыя манлан? – щиты лув Нампар войн, порн па хул эватты сохалн инщасса.

– Ал хун мандам, шеңк щи мандам! – дыеда волтап ястас.

Щитэлн холыена ай хопа дэлаплат, еллы мандат па арылат:

– Пулн кары хопиев поль-поль-поль, Ов шашна сора-сора маныдылуд!



Меңк ики пилна ляль верлуд, Ищипа, ищипа нох питлуд!

Хув муй ван кут дый щиты мандат. Имолтыйн па щи турсый худлат:

– Нох таладн манэм, иса щи пошсайм!

Щиңанца хопелн посал кутпа мандат аплакел йиңк элты нох талдат па инщаслат:

– Наң па муй щирн там посал кутпа питсан, муйн наң там вуш унты тусайн?

– Ма инмунты доламты меңк икенаң ты курн шухсасайм.

– Щимащ вер ки тыйс, мосаң, наң муң пилэван ищи меңк икен пилн лялястыя манлан? – щиты лув Нампар войн, порн, хул эватты сохалн па волтапалн инщас-са.

– Ал хун мандам, шеңк щи мандам! – аплак дыеда ястас.

Щитэлн холыена ай хопа дэлаплат, еллы мандат па арылат:

– Пулн кары хопиев поль-поль-поль, Ов шашна сора-сора маныдылуд!

Меңк ики пилна ляль верлуд, Ищипа, ищипа нох питлуд!

Хув муй ван кут дый мандат. Имолтыйн па щи турсый пан питар элты худлат:

– Манэм йиңк, манэм йиңк мияты!

Нампар войие ёхлад пилн пан питара хойл, ай дар хулэл йиңка тулэл па щиты лувел инщаслат:

– Наң па, дар хул, муй щирн сорам пан питара питсан?

– Ма меңк икенаң там сорам пан питара курн шухсасайм па тата нох сорты партсайм!

– Щимащ вер ки тыйс, мосаң, наң муң пилэван ищи меңк икен пилн лялястыя манлан? – щиты лув Нампар войн, порн, хул эватты сохалн, волтапалн, аплакалн инщасса.

– Ал хун мандам, шеңк щи мандам! – ай дар хул ястас.

Щитэлн холыена ай хопа дэлаплат, еллы мандат па арылат:

– Пулн кары хопиев поль-поль-поль, Ов шашна сора-сора маныдылуд!

Меңк ики пилна ляль верлуд, Ищипа, ищипа нох питлуд!

Хув муй ван кут дый мандат па посал питара щи ёхатлат. Вуты хойлат па вантыдылат, хоты посал питарн и ун наңк юх павартат элты верам хот омасл. Ин Нампар войие нумасл:

– Алпа, щи хот хоща меңк икен ул?

Щалта лув пилэлн ёхтам пилёххлада щиты ястал:

– Нын, ёх, тата хащилдыты-сары! Ма яңхдам па вантлэм, хой щи хот лыпийн ул?

(Еллы па ул)

Владимир Енов  
ханпсалды



Хор: Илья Михно



## Ханты улапсаев шавилдэл па елды тудэл

Там мосванан округев 95-мет талад постас. Ямал мувев хуват кашң тахайн емаң хатлат мант-сат. Сади́ка яңхты ай эвиет па похат си хатла па дэсатысат: лунтарат, якат, арат уталтысат, хорат ханшсат, мойң хоятат пидан уйтантысат.

Пулңават вошан «Мувхор» нэмпи сади́ка «Мурхи сун» па «Сорни тутые» ханты арат арыты па нарасьюхан ёнтты группаята яңхты ханты эвет па похат ай няврэмие́т хося яңхсат.

Каш верты хотан рупитты нэ Наталья Фёдоровна Ребась ханты няврэмлюв пидан «Хатл ёш» группайн емаң хатл дэсатысат. Ай няврэмие́т ещад арысат, ёнтсат. Похиет Овс мув касасаята пидтасы́сат, эвиет ерна́с ёнтты ура́нан мосты пормасат акатсат. Яха округев элды инсяса́сайт па ама́матсет дэра́псат, мастер-классан хорам ву́ды хот ёнттот версат.

Наталья Фёдоровна рупатаед элды каматса ясаң ястас: «Хасям лапата́н округев емаң хатла́д постас. Хасям талата́н номас версу́в, сади́ка яңхты няврэмата Ямал мувеван улты шо́ши мир хоятат элды потар туты. Арпе́лак ханты хоятат ула́пса, хорам сохлу́в, арлу́в, яклу́в, му́й хорпи нарасью́хат тайлу́в, альлу́в.

Округ емаң хатл елпийн иса ход «Бережок», «Журавушка», «Оленёнок», «Кристаллик», «Светлячок» садиката па нарасью́хан ёнтты хота яңхсу́в. Щита улты няврэмата па каш дэсатысу́в».

Тамащ уйтантопсайт шеңк мослат. Си онтасан сади́ка па ашкудая яңхты няврэмат ханты хоятлу́в элды аршак уятты питлат, ханты улапсаев елды манал.

Альбина Тырлина  
ханшам потар



Хор: Альбина Тырлина

**Газета**  
**«ЛУХ АВТ»**  
Адрес редакции:  
629003, ЯНАО,  
г.Салехард,  
мкр. Богдана Кну́нянца,  
д. 1, каб. 106  
+7 (34922) 4-68-63  
E-mail:  
luh.avt@yamal-media.ru

**Учредитель**  
Департамент внутренней политики  
Ямало-Ненецкого автономного округа  
(629008, ЯНАО, г.Салехард, пр-кт Молодёжи,  
д. 9, каб. 708)  
**Газета зарегистрирована**  
Управлением федеральной службы по надзору  
в сфере связи, информационных технологий  
и массовых коммуникаций по Тюменской  
области, ХМАО-Югре и ЯНАО  
19 апреля 2012 года  
Регистрационный ПИ № ТУ72-00558

**Тираж 1300 Заказ 1749**  
**Подписные индексы:**  
на год – ПА700, на полугодие – ПР561  
**№ 51 (1302)**  
Газета вышла в свет 20 декабря 2025г.  
Подписано в печать 18 декабря 2025г.  
по графику: 16.00  
фактически: 16.00  
Газета выходит по субботам  
Цена годовой подписки 88 руб.,  
в розницу не распространяется

**Издатель**  
Департамент внутренней политики ЯНАО  
(629008, ЯНАО, г.Салехард,  
пр-кт Молодёжи, д. 9, каб. 708)  
**Отпечатано в АНО «Ямал-Медиа»**  
Юридический адрес: 629003, Ямало-  
Ненецкий автономный округ, г. Салехард,  
мкр. Богдана Кну́нянца, д. 1, каб. 106  
Фактический адрес: 629007, Ямало-  
Ненецкий автономный округ, г. Салехард,  
ул. Чубынина, д. 39А

**Генеральный директор**  
АНО «Ямал-Медиа»  
Зулинова  
Марья Андреевна  
**Главный редактор**  
Яковлева  
Алина Кирилловна